

ILLUSTRIS
SELIGMANNI,

JUSSU

REGIO

sub initium anni M DCCV.

IN

AULAM

VIENNENSEM

proficiscentis,

VIA M

faustam, salutarem ac gloriosam

esse cupit

Cliens

JOHANNES ELIAS WEISE,

J. U. L.



ZITTAVIÆ,

Typis Michaelis Hartmanni.



Ic annus, qvem adhuc gratulando celebramus, fausta nobis obvertit initia. Novum adest BEATI Nominis omen. Magisq; nunc illustratur publicus Zittanorum Amicus, ut imposterum beneficia, qvibus exhibendis natus est, magis sint publica. Multi secum, multi cum familiaribus ea loqvuntur, qvæ nec satis repeti nec satis optari possunt. Cur in hoc lætantium consensu devota mea fileat pietas? qvæ utinam verba nunc haberet in promptu, sublimioribus oculis digna.

Affecutus es, inclyte SELIGMANNE, qvod Nominis adeo sancti mensuram implet. Magnum est REGI placere, qvem suorum nec ingenia, nec virtutes, nec successus fallere possunt. Impenetrabilis ipse nihil non penetrat. Qvicquid judicio tam Augusto gloriosum est, hujus gloriam ubiq; novimus pretiosam. Neq; tamen minus est HEROI placere, qvi forte solus tanti REGIS magnitudinem capere potest. Qvas enim Virtutes Augusto huic muneri cognovit necessarias, earundem vestigia legi simul a subsequentibus gaudet. Ipse vigilantissimus, constantissimus, perspicacissimus, qvos diligere cœpit, hoc testimonio statim a tarditatis, timiditatis ac inertis animi suspicione penitus absolvit.

Vivat igitur **REX** Potentissimus, Vivat cum Eo **FURSTENBERGIUS** Serenissimus, ut sub tantis auspiciis, Virtutes hoc seculo dignas, elucescere semper videamus.

Sic digno tuo Capiti felicissime favebit Illustrissimus **CANCELLARIUS**, **FRISIANARUM** laudum, qvæ Bonum publicum continent, Stator & Custos. Sic præsentissimum habebis Incomparabilem **ZECHIUM**, nostris qvidem præconiis superiorem. Sed tempus est, ut splendidum Ministerii officium suscipiatur. Qvamobrem aggredere fortunatis omnibus gloriosum hoc iter: donec in eo Germanicæ salutis centro spectes **AUGUSTISSIMUM AUGUSTISSIMO** coniunctum. Invenies Aulam mirificis superiorum mensium victoriis exultantem: cuius lætitiae, dubium non est, qvin nostra qvoq; Patria particeps evadat. Scimus enim, cui tanta spes fuerit concedita.

Sane tempora nostris sæpe rebus intercedunt, qvibus ingenia vel mediocria sufficere videntur. Tunc secundo flumine qvivis sibi placet Nauclerus. Sed in hoc fluctuantis Europæ tumultu, qvi mundum exigua sapientia regi posse contendat, vereor ne propinquum habiturus sit naufragium. Mundus parturit miracula, nec admirationis publicæ partem aliquam assequitur, qvi, qvod homines olim mirabantur, simpliciter imitari studeat. Plus igitur tecum asportes, plus ibidem probes, qvam nostra gratulantum vota concipiunt.

DEUS est, cuius arbitrio res humanæ succedunt. Eo permittente misceri multa solent, qvibus explicandis veniens e machina solatium sufficit. Huic commendata fit catastrophe. Neq; nos destituent vota fundamentis adeo firmis innixa. Certe si qvid valent preces Zittaviensium, eas & itinerum & consiliorum ha-

habebis comites. Respiciunt Consulem suum, absensem aliquando, sed vel ex ea causa praesentiores. Experiendo didicerunt, quam commoda sit in tempore veniens dexteritas. Sic ut diu possideant, quod habentus possederunt, precantur: Oculos in Te convertit Nobilissimus Senatus: nec alio spectare sustinent coniunctissimi Cives. Neque nullum pondus addent intercessiones, quas Summè Reverendus FRATER Tibi quam libentissime debet. Is Lipsiam colit, nostris finibus amicam. Inde qui novam illam Patriam cupit esse fortunatam, pristinæ suæ Patriæ tanto minus obliisci potest. Est etiam sua vis in cordatis Clientum acclamationibus: quo propius enim suis successibus coniungi vident splendorem Tuum: eo fidelius, tanquam in negotio suo, pietatem volunt occupatam.

Facere non possum, quin Optimi Parentis mei mentionem faciam, cuius quidem sinceritas annis superioribus intemerata, nunc senectutis vitium vix contrahet. Is cum ad functionem suam esset vocatus, B. Parentis Tui verbis solenniter excipiebatur. Addita quædam fuerant, quibus agnoscendis obstitit modestia. Nunc tamen ea transcribere, meliore non solum jure, sed omnibus etiam plenioribus liceat: *Vincet: nam sapiens est. Explebit: nam plenus est. Superabit: nam potens est. Dominabitur: nam divinus; nam Christianus est.* Hac tessera Paternam benedictionem renovari credes, quo magis Viri meritissimi sepulchrum novis subinde titulis augere conatus es. Reliqua dicamus, ubi Negotiorum effectus fiduciam nostram coronaverit.

DEUS Te servet.

Scrib. Zittaviae, d. 12. Januarii, M DCCV.

